



Dr. Kamaruzaman Ampon (depan, kiri) berarak bersama anggota Lembaga Pengarah, Senat dan graduan UMS ke Dewan Bandaraya Kota Kinabalu bagi memulakan majlis perarakan itu. Yang di Pertua Negeri Tun Datuk Seri Panglima Ahmadshah Abdullah akan merasmikan konvokesyen dua hari bermula 9 Oktober ini di Dewan Canselor Jalan Sulaman. -fotoBERNAMA

65 graduan UMS berarak di bandaraya

KOTA KINABALU: Perarakan ke-4 Graduan UMS, juga dikenali sebagai perarakan 'Town & Gown' diadakan di sini pada Rabu menjelang Konvokesyen ke-12 universiti tersebut.

"Perarakan ini dianjurkan setiap tahun sebagai simbol penerimaan daripada Dewan Bandaraya terhadap populasi institusi pengajian awam, terutamanya UMS," kata Naib Canselor Prof Datuk Dr Kamaruzaman Ampon.

Perarakan bertemakan 'Ilmu Tonggak Transformasi Masyarakat' itu bermula dari Jalan Pantai menuju ke bangunan Dewan Bandaraya di sini.

Turut hadir ialah Mayor Datuk Iliyas Ibrahim, Pengerusi Lembaga Pengarah UMS, Tan Sri Abdul Hamid Egoh, Timbalan Pengarah (Korporat) Dewan Bandaraya yang juga Pengerusi Perbarisan Bahari Hj. Hassan, Timbalan Pengarah (Operasi) Dewan Bandaraya Joannes Solidau dan pengerusi penganjur bersama yang juga Dekan Sekolah Perhutanan Tropika Antarabangsa UMS Prof. Madya Dr. Mahmud Hj. Sudin.

Dr Kamaruzaman berkata, perarakan itu disertai 65 graduan mewakili setiap program pengajian yang ditawarkan UMS.

Katanya, 150 ahli persatuan berpakaian seragam seperti Palapes, Suksis, Palapes Udara UMS dan sebuah pancaragam polis turut mengambil bahagian dalam perarakan itu.

Sementara itu, Iliyas berkata, perarakan tahunan itu boleh merangsang semangat positif dalam kalangan rakyat untuk mencapai kecemerlangan.

Sebagai tambahan, katanya, penduduk bandaraya yang menyaksikan perarakan itu akan merasa terdorong untuk menggalakkan anak-anak mereka melanjutkan pelajaran di institusi pengajian tinggi. |